

# KOLOSI

## Poloyo Kolosi Yeneke Wia Wetekane Pipia

**1** <sup>1</sup>Polo nopa Akolaliyo one wene toopikale tokome Keraisu Yesuno agale oane auane yamotoa moa kakaka Aposelo ago i mekene uku.  
<sup>2</sup>Tone oya ago Timosi totamepa Kolosi take Akolaline ali atoa Keraisuke wene tuga meki-kiti tone oya-lawe kiwike i pipia wini wia wetekako-ye.  
Toneketai Akolaliyo kiwi pewe wia tepe kolotini kilikoa pikoa tomotoane kini kowitikoane uku.

### Poloyo Akolali-pala Ke Wa Kowitanemo

<sup>3</sup>Kini kowitikakete-kama tone Ali Muno agono etene Atai Akolali-pala ke wa okala toko. <sup>4</sup>Keraisu Yesuke wene tuga mea Akolaline yatene meki peyake wene mekhoa tekete tikimo yatekooya tekete ni oko. <sup>5</sup>Widikakilepa kini mea kakete moatekoya-kitipa Akolaliyo a tibuke pikoa katekako wa kolotine nepia mekete ni tiki. One eni tokomo titia yatekilepa Akolaline niminimopa Keraisunomo yatekoi-pete einapete titia yatekoi. <sup>6</sup>Keraisunomo kiwi wini mekoika oa aua nekeneya yatekoimopa ta piko peyakeka pupitikama pok. Nitikolo yatekete eni take mekitame kinikinakale tewitikoa epeteko mema yakete tiki. Nipa anu oya-lawe kime einakamo titia yatekoi-pete laigoapa ipa Akolaliyo ali atoa pewe witikome tokomo tadeko wa kinikinakale tewitikoa epeteko mema yakete tiki toa tiki. <sup>7</sup>Einakamopa tone kolotini ago Epaperasiyo i i wa kiwi olaukaneya. Keraisunole toto-pala odene wene pia takama yako agoke uku. Tou wa okole-kama tokala toko. Einagopa toto luku wida nome mekome Keraisunomo olaukaneya. <sup>8</sup>Einago oto nokome kiwi ko eya wa oka. Epetane Yomini kiwike awinaneya tokome yete pade ali atoake wene mekhoa mekete tiki wa oka.

<sup>9</sup>Nikepa kiwi mekete tokoimo titikene yatekou-pete laigoane kini kowitikoane-kala meku. Eya wane oane kowitikakala tuku. Akolali

neke wene pikole adekake kakoa wene tootapemotoapa Epetane Yomini e yene kiwike awia tagatapekomē i i wa wene takamotonō ta wane kini kowitikaku-ye. <sup>10</sup> Nipa Ali Munagono wene moteketepa one wene epetekatiki toa ele kule epetanele-kama toomoa pomotoane ni uku. Epetane kū tuou toa ele kule epetanele-kama toa ni Akolali mekome tokole i i wa ate toa wene tomotoane tekene Akolali-pala eya wane kowitikaku. <sup>11</sup> E yene kiwi neke tele patu kautakoa kamotonō, a tibuke pā tootapeneyā meke telekole toko peku lawetoano ta. Ele kuleme ke enekakale meake nekele poti wene pia takoa togakete wedia memotono, nitamene wane kini kowitikoane uku. <sup>12</sup> Kiniketai Akolali-pala ke wa omotoane uku. One wa takoa motane yenāme one a tibuke pā takalogakota moatikiyapa kimeka moamele toko wa one mana konomikitī moa latikakano, ke wa amene wane uku-ye. <sup>13</sup> Totopa Setanuke lukoa mekete yomiyomu keneke yakooka toa mootokoapa one kolotini ago Keraisuyo talo toko take moa kakaka. <sup>14</sup> Keraisu einagome tokake toto eni toa motikilepa tone poanele tokooke po letumekakana keemu tokome toka.

### Akolaline Yagono Ago Keraisuke Akenemo

<sup>15</sup> Akolali einagopa tone leneme enamele toamokoyake one yagono ago Keraisu Yesu ali latia toto mekota nekeneyā. Akolaliyopa one latikanakeya-kiti peya i agoke-kama lukoa memotoane tuku wa Keraisu einagopa one namolo opiane mana tetepo takoa ako odene tobou meateka ago latia kakaneyā. <sup>16</sup> Akolaliyo eya kuya peya latiou wa wene kibutukapikana toa Keraisu-palapa kelepitikoa latianeyā. Nipa tibukeka itonokeka tone leneme enamokoya-kiti ni tone leneme enekoya-kiti ni tibu talo toa meki edelo ali-kiti ni kiwike lokoa tobou meki-kiti enika eni peyame onekele takamotoa Keraisuyo-kama latikala taneyā. <sup>17</sup> Eya kuya peya wete latiameneyake onepa pa mea kama nekeneyā. Eniya peya pia kawa toateko toa pia kawa tomotoa oneme yopimoa noko. <sup>18</sup> Akolaline ali atoa totopa one tigini. Onepa tone tobou wane. Mea kama pikilepa one patu-kama kautakoa kakete toko. Akolaliyo tuane yene moa kamotokakilepa einago namolo takoa moa kamotokaneyā. Ako odene tobou meateka ago memotoa nitaneyā. <sup>19</sup> Ni agopa Akolaliyo one kotuke-kama memotada wa one peku lawetetapeneyā. <sup>20</sup> Nitōapa a tibukeka itonokeka meki peya one-pala odene wene pianeyā memotoa eya taneyā. Mana Keraisu lekane yomeke tuaneyā kakata kamate ponokale tokome poi piato wa teigoa wakeneyā.

<sup>21</sup> Papete kipa poanele toma yakoiya tekete Akolali-pala wene poaneyā mekete ete pilia wakeneyā. <sup>22</sup> Opa mana Keraisu yomo lekaneyake wia dekakoli tukale tokome Akolaliyo kiwi oya kakoa meko. Nipa kime eya toa memotoa tokome taneyā. Onekele-kama takoo wa one leneke poane

wene takoa koikatapeneya mekete padeya namike akoa agale oatekale toamomotoa tokome taneya.<sup>23</sup> Edikoa meadetepa Keraisuke wedoa wene tuga mea one patu kautakoa kakete poapeneya kamene. Nipa onekemo oa metane toa taateko toatekale nepia mekoina toa nepia mema pamene. Onekemo wane ukupa ta piko peyake oa pupitikanemoke uku. Einakamo oa aua yamene wa Akolaliyo Polo noka takoa moa kakaka tokolo uku.

### Akolaliyo Polo Takoa Moa Kakanemo

<sup>24</sup> Opi tete mokoane kakilepa kiwike toane motukuno, ke wane wediane meku. Nipa Keraisuyo one yatene ali atoa totopa one tigini wa tetepo takakome kiwike tuku wa tete pegetoa moma yakene toane moma pone togou wane tete moma yaku. <sup>25</sup> One yatene meki-kiti kiwi auapemota tokome Akolaliyo noka takoa moa kakaka. Nipa onekemo pine ina ina wa toaweane akatapemota ni toka. <sup>26</sup> Papete mali ponoka toa-kama itonoke pitikoi peya-pala one eni taateko toatekamopa kaukoa mema nekeneyake opa one wa takoa motane yene peetapea oko. <sup>27</sup> Kerais kini tepene nome mekomo kamo takou toa eni peetapea ikilepa e ku pa yatene-kitika one take p<sup>a</sup> tootapeneya mea kamotoa taateko tokomo eni okome toko. <sup>28</sup> Nitikono, Keraisu einago ko-kama totome oma yako. Nipa Akolaliyo wene takako toa ali atoa peya mane mane oa olauko tikilepa Keraisu patu kautakoa kakete epetekoa meatiki kotuke kakoa meemoa pomotoa tokome toko. <sup>29</sup> Nitimotou wane pupuke-kama pebetekaneya wili toane kakilepa Keraisuno tele patu kautakoane kakene tuku.

**2** <sup>1</sup>Kipala imo ikilepa kiwika Leodisia take meki-kitika anu lene timini enameneya meki-kitika mama mati motekene tekene kiwi peyanele wedoane takaku pekene tukumo wene tomotoane uku. <sup>2</sup>Kini wene weye akaneya mea odene wene pianeya meato wa wene mekanali yoa tomotadiyano wene pikene ni uku. Edikoa mekolipa Akolaliyo kiwi kamo takatapeou toa eya too. One papete wene toopianemo kaukoa mema nekene toa taateko tane agopa Keraisu tadeko wa kime wene tootapemota too. <sup>3</sup>Etenane peku nootapeane agoke uku. Akolali wene muno meaneya mea pademo pademota wene taneya mea toko toa i i wa oneme-kama tqawea okoya. Nipa potipiane kamoya-kiti yawa meou toa tokolo uku. <sup>4</sup>Panagome agale muno pewe kakoa i i wa kiwi oa yotokakaya tokolo ni uku. <sup>5</sup>Ta padeka mati mekenekie kiwi pakeke none menou toane mekene enekulu kipa odene wene pianeya mea Keraisuke wedoa wene tuga mea tikile enoane tekene wediane meku.

### Keraisu Patu Kautakoa Kama Pamene

<sup>6</sup>Keraisu Yesupa kini Ali Muno wa pegetoa lukoa mekete tokoina toa one patu kautakoa kama pamene. <sup>7</sup>Yomo pade pema itonoke epetekoa

witakome teke yukuka yekeikata wetekou toa eya toma pamene. Kiwi olaukanele tekete Keraisu patu poapeneyea kautakoa kakete onekele wedoa takama yamene. Akolali-pala ke wa-kala oa nitamene.

<sup>8</sup> Pade ali-kitamepa kini kaua-mikitame emo kumo pamo olaukama nekenele litia tato wa pa itono peku lawetao kiwi oa yotokakayano, wedoa meamene. Dikane yene Keraisuno agale patu kautakoa kawameneyea nitoino, yakameamene. <sup>9</sup>Keraisu einago tono melepu kakeneya nikilepa etenane peku-kama nakene ago eni nekeneya. <sup>10</sup>A tibukeka itonokeka mea telekole toa yopiki peya oneke-kama lukoa meki. Keraisu einago-pala anu oya-lawe kiwi lipuamekili tokome Akolaliyo one eni nakene peku lawetao tagatapeko. <sup>11</sup>Nika kiwi mone pa yeneke Akolaliyo kepene teigane yene tetepo takoa one wa takoa motikilepa Keraisu einago-pala lipua mekike toko. Kini tepene witako poanele Keraisuyo moa kogamu taneyake ni toko. Nipa pa alime pa tokoo kepene teigoa adeka pianeyake tokoya mena. <sup>12</sup>One yene kime ue motikilepa Keraisu-pala odeneka deko oloyo tane tetepo taneya mea tokoi. Nika Keraisu-pala odeneka deko moa kamotokane tetepo taneya mea tokoi. Nipa Akolaliyo telekole toa moa kamotokamele toko wa oneke wene tuga mekete nitikoi. Keraisu tuaneya pikale moa kamotokane agoke uku. <sup>13</sup>Papete kepene teigamene pa yene kini namolo poane wene litikete Akolaline totono tetekaku pekete tokoli Akolaliyo tuane yene tetepo takoa wakeneya. Nitanyake opa mea kama poati wa Keraisu-pala lipukoa mekaneya. Nipa tone tokoo poaneleke po letu mekakana keemu tokome taneya. <sup>14</sup>Nipa Moseseyo yametane totono tetekaku pekete tokooke po letu pima nokana toa kibu moo tokake Akolaliyo eni letu keemu taneya. Eni totonopa yomo lekaneyake wia dekou toa katekoawakome taneya. <sup>15</sup>Nitoapa a tibuke Setanuno peku noa telekole toa meki-yene-pala eya taneya. Poi tobou agome-kiti ali atoane lene yoto kakome po kakoa lia aua pou toa eni yene moa kawikatapeneyea. Keraisu yomo lekaneyake tukale tokome taneya.

<sup>16</sup>Nitaneyano, pade ali-kitame ue nee eya padefa kekaneya latikoa ni malikeka tokene kabepo kaka-peteka ko mea pupu toamoko-peteka kini losule toko toa mone pa yene kime litia toamiki wa kikoa akakolipa yakoa toameamene. <sup>17</sup>Enika eni losule tikilepa Akolaliyo nani taatekoatoatekale pa tekei toa adeka pima nekene toa tiki. Keraisu wete nome taatekoatoa taneyake tiki. <sup>18</sup>Dikaki yene kini wa lede keku meane ali-kititetepo takakete edelo yenanele takama yato wa kiwi oa yotokakayano, yakameamene. Nipa pulete ele kule enekou agome ukuno, yakoa tamene wa mate agale ou toa ikilepa pa itono peku noa tekete iki. <sup>19</sup>Nilepa tone tobou kakago Keraisu-pala moa lipukaneyake wawa etepea yakete tiki. One tigini kakaku wa Akolaliyo toto katea pitakaya wa Keraisu oneke-kama dekamoa lipukoai toko ago eni pilia wakete tiki.

<sup>20</sup>Kipa Keraisu-pala odeneka yomo lekaneyake wia dekaneya kawa tuou toa pegetoa nakoina itono pekupa wakoinake edoa wa naki-pe.

<sup>21</sup>Nipa iya pikoa kawamoia eya noamoa padaya mitikamoia tamene wa papete olaukanelepa edoa wa litia toadete-pe. <sup>22</sup>Enika eni pia kawamatekoya-kiti kekoa wakilepa ali-kitame kini weneme wene kibututukoa olaukanele litia tiki. Enika eni ue nee eya nootokoapa wa pade oyake moa namele toamokoyano, enika eniyamepa kini wene edoa moa koigoo-pe. <sup>23</sup>E yenamepa kini losule wedoa toa ni nate wene pianeya mea ni kini tigini wa tete meou toa eya kuya wawa noamoa tiki. Nipa wene muno meane yename olaukanele tuku wa tekete tiki. Padele poanele-kiti kini weneke wa witakoa kibutua toamoo wa wene pia tikiyake pata pale tekete tiki.

### Keraisu-pala Lipua Mekete Toatekomo

**3** <sup>1</sup>Kipa Keraisu-pala odeneka moa kamotokane tetepo taneya meki. A tibukepa Akolaline nimini yono kounoke Keraisu tobou ago mea kakono, aida meane kawateku peku noada wa wene pianeya meamene. <sup>2</sup>A tibuke mea kakete toatikileke-kama wene piitikaneya meamene. Pa itonoleke wene piitikaneya meameamene. <sup>3</sup>Kipa Keraisu-pala odeneka tuane tetepo taneya meki. Tuane alime-kiti itonolepa edoa wa tomotoape. Opi Keraisu Akolalimekota mekome one yono tatonoke meati wa kiwi potipia yopikoa kako. <sup>4</sup>Kiwi mea kakako ago Keraisu wakapea nokale kipa onepala odeneka kakete one kaka toa pa teleta takatapeneyea kawei.

### Namolole Tewitikoa Wenele Toma Pamene

<sup>5</sup>Kipa Keraisu meko toa meoino, pa itonole eya toadiya wa wene pikile tewitikoa wamene. Atoa liou abele tou enika eni poanele ele kule toane potokou ni eya kuya ako-kama mou wa wene pia toameamene. Eya kuya ako-kama mou wa itonya-kiti tobou kakakilepa Akolali odene tobou kakamele tokoyake tiki. <sup>6</sup>Ali atoame enika enile toma yakili enekome Akolaliyo kibu mou wa kotimi yoa meko. <sup>7</sup>Papete kimeka enika enile toadiya wa wene pia mea etepea tuku pekete tokoi.

<sup>8</sup>Opi pade kinikinakale tewitikoa waketepa eya-kiti toameamene. Kotimi yoa ali atoa-pala bu oa lene pia eko pade ali atoa-pala akoa agale oa tiyo moa toameamene. <sup>9-10</sup>Ete oto wa kapene agale wameamene wane uku. Kini namolole poanele toma yakoinakalepa namolo mamina takoa wawa eina luku weneya mamina moa kawou toa poane wene wawa epetane wene pianeya yakili tekene ni uku. Widikoa memotoa toko ago Akolali kotu kakoa meadete poti toma peketepa one wene tootapeneyea meoi. <sup>11</sup>Nitoino, Akolaliyo pa yatene agoka Yu yatene agoka takoa enamoa ni kepene teigamene yateneka kepene teigane yateneka takoa

enamoia toko. E ku pa yateneka kueme topo toa moa egetane yeneka ta pine yeneka takoa enamoko. Ako odene kako Keraisu toto peyake awinaneya mekono, Akolaliyo toto peya odene yatene tetepo takoapa Keraisuno yatene wa oko.

<sup>12</sup> Akolaliyo onekele takamotoa kipa one kolotine yene wa takoa motaneyano, eya toma pamene. Yete pade ali atoa mama moa auapeamene. Ni nate wene pianeya mea uutukoa poti yawa tamene. <sup>13</sup> Nipa kiwi padamedo poanele tokalepa poanele ete topo takamekete eina poanele tokake po letumekakoina keetaapea wawa ete oto wa mama moamene. Nipa Ali Munoyo kini poanele-kala tokoike po letu pima nokana kemu toa wakene toa tamene. <sup>14</sup> Nitaoopa eya tobou kakoa tamene. Ete oto wa wene mekanali yoma pamene. Nile teketepe epetekoa meatiki toa odene wene-kama pianeya meo. <sup>15</sup> Keraisuyo one peku lawetekome yametekana toa wene odene pianeya mea tepe kolotini kilikoa pimotoa meamene. Akolaliyo kipa one wa takoa kayo oa motikilepa edikoa meemoa pomotoa tokome taneya. Nipa odene ago Keraisu-pala-kama moa lipukoa odene tigini tetepo takoa taneyano, ke wa okala tamene. <sup>16</sup> Kamoya-kiti mou toa Keraisunomo-kama yakoa moamene. Akolaliyo wene takako toa ete oto wa olaukoa mane mane oa tamene. Nitao eya kuya lo agaleka Same agaleka ikilepa kini tepene meaneya yawa Akolali-pala ke wa oa tamene. <sup>17</sup> Ele kule toa emo kumo oa tikkaka Ali Muno Yesuno ibini-kama wedekoa one patu kautakoa kakete tamene. Nitiketepa Atai Akolali-pala ke wa okala tamene.

### Keraisuno Ali Atoa Mekete Toatikimo

<sup>18</sup> Atoa yatene kinikanek poti lukoa meamene. Ali Munoke wene tuga meketepa edikoa meamedikili ni uku. <sup>19</sup> Ali yatene kinikatuke wene mekoia mema pamene. Tete eya meameamene. <sup>20</sup> Mati-kiti kiniketai kinikquatame okoi toa-kama litia tamene. Nile tadekolipa Ali Munagono wene epetekatekoile tekete toi. <sup>21</sup> Etene yatene kini mana kono-mikititimini natekatikile toameamene. Kini wene keda taneya mea etepea pokaya tokolo ni uku. <sup>22</sup> Kueme topo toa moa egetane ali atoa kini pine yenamye okoi toa-kama tamene. Pinago kakakoane no wa kei pimotoane tekene onekele wedoane takatekuyake opi kote aumoane tuku wa pale toameamene. Nitameneya Ali Munagoke poti wene piitikaneya mea kinikile wedoa takamene. <sup>23</sup> Nipa pupu pinagonole takaketeka ipa Ali Munagonole takou toane tuku wa wedoa takakala tamene. <sup>24</sup> Nipa kime edikakolopa Ali Munagome topo takakome one mana kono-mikitilatikakome kini moatekoya kotuke kakoa meoo wa wene taneya mea tamene. Ali Muno Keraisunole takama yakiya. <sup>25</sup> Poanele tiki yene-pala Akolaliyo topo takoa kibu moademe toko. Nipa eni yene peya midi pikoopa kini tane toa nami wia kibu mokala too.

**4** <sup>1</sup>Ta pine yene kini kueme topo toa moa egetane yene talo tekete toatiki toa epetekoa talo tamene. Nipa kiwi talo toko agopa a tibuke meko wa wene tekete tamene.

### Poloyo Wipitikome Mane Mane Akenemo

<sup>2</sup>Akolali-pala kowitikala tamene. Nipa kote au moameneya kowitiketepa one-pala ke wa oa kowitamene. <sup>3</sup>Toneka kowitikamene-ye. Akolaliyo ile tou wa papete wene toopia kaukoa mema nekenele Keraisuyo taatekoia taneya. One eni tanemo totome i i wa oma yakookepa po yapu po kakaneya pitikuno, onekemo toawea akateko ka yamea ta wa tone kowitikamene. <sup>4</sup>Nipa no einagome einakamo keleyo toawea akateka toa omotono ta wa anu kowitikamene-ye.

<sup>5</sup>Keraisunomo yakoa moamene yene pakeke meketepa wene muno meaneya meamene. Keraisunomo oatikika-kama onekemo i i wa toawea okala tamene. <sup>6</sup>Dikane yene-pala ko ikilepa kini wene kakoa epenemokama oa tamene. Nitiketepa e yene-pala agale topo takoa auapeatiki toa wene kibututukoa mea okala tamene.

### Poloyo Wipitikome Akenemo

<sup>7</sup>Eya ago Tikitaki wida nokome anu toma yaku ko peya akano. Einago tone nimini oya agome Ali Muno agonole toto-pala odeneka takama yakomepa wedoa-kama takako. <sup>8</sup>Nitane ago kiwi mekita wida wetekakilepa toto mea tokomo wene takoa ni kini wene weye ahoa tomotoane tekene tuku. <sup>9</sup>Einago Tikitaki-pala eya ago Onisimasi neka opia pamene wane wetekaku-ye. Einagopa kiwi Kolosi yatene ago toto oya kakoa wene meko meko ago oneme tou wa okole-kama toko. Einagota kiwi mekita wida nekete i Lome take tanemo-kama akataapeoi.

<sup>10</sup>Eya agota no-pala odeneka po yapu pitiko ago Arisakasi ni Banabasine pewenago Make einagotamepa kiwi epetekoa meamene wa iki-ye. Make einago wida nokalepa makutukoa moamene. Onepala tamene wane papete oane wetekakounakamo kime wete yatekete tokoi. <sup>11</sup>Ni Yesu one pade ibini Yasasi einagomeka kiwi epetekoa meamene wa oko-ye. Akolaliyo ali atoa talo toa mekomo i Lome takemekene oane meku-mene eni Yu ali-mename odene no mape moa meki. Nitoa auapekete anu wene weye ahoa meki. Ete Yu yenamne Yesuno agale yakoa moake no auapeamiki.

<sup>12</sup>Kiwi Kolosi yatene ago pade Epaperasiyoka kiwi epetekoa meamene wa oko-ye. Einago Keraisunole takama yako agome ete pia oto pia eya wa kini kowitikako. Akolali neke wene pikole toa meatiki toa toa togamotono ne patu kautakoa poapeneyaka kekte nitimotono ta wa kini kowitikakala toko-ye. <sup>13</sup>Nitoa kiwi Kolosi yene auapeou wa wedoa kowitikoa kakilepa eya tatake Leodisia Irapolise tatake meki-kitaneka

kowitikako-ye. Enipa etene nimini uku. <sup>14</sup>Eya agota tone kolotini ago dokosa ago Luke Dimasita kitameka kiwi epetekoa meamene wa iki-ye.

<sup>15</sup>Tone oya-lawe Leodisia take meki-kiti-pala epetekoa meamene wa akamene. Eya atoa Nimepa one-palaka one yapu keneke losu toa koukoai tiki ali atoa-palaka epetekoa meamene wa akamene-ye. <sup>16</sup>I wiane wetekaku pipiapa Yesuno ali atoame yakamotono, oi motokamene-ye. Nitoa oi mootokoapa Leodisia take meki-kitameka yakamotono, eni take moa wetekamene. Ni Leodisia take wetekaku pipiapa Kolosi yene kime oia moa oi moamene. <sup>17</sup>Eya ago Akipaisi-pala eya wa akamene-ye. Nepa Ali Muno agome oyametekana toa onekele takoa togamene wa akamene.

<sup>18</sup>No Poloyopa kiwi wete meamene wane wipitiane ukumopa noanu yoname i witiku-ye. No po kakanya po yapu pitiku wa wene taneya meamene. Akolaliyo kiwi pewe wia kamotoane kowitikoane uku-ye.

Opa anu agale eni.